

KESAN PEMERINTAHAN KOLONIAL TERHADAP KEGIATAN EKONOMI MASYARAKAT MELAYU DI MELAKA HINGGA ERA KEMERDEKAAN

*(EFFECT OF COLONIAL GOVERNMENT OF THE ECONOMIC
COMMUNITY OF MALAY IN MALACCA UNTIL THE ERA OF
INDEPENDENCE)*

Nurdiyawati Abidin & Adnan Jusoh

Abstrak

Objektif kajian ini bertujuan untuk menggalurkan perkembangan ekonomi pertanian masyarakat Melayu di Melaka bermula zaman tradisional hingga Tanah Melayu mencapai kemerdekaan. Kajian ini akan menelusuri tiga zaman utama iaitu sebelum merdeka, semasa pemerintahan kolonial dan selepas merdeka. Kajian ini akan membincangkan perubahan ekonomi masyarakat Melayu kesan pemerintahan kolonial hingga era kemerdekaan. Kajian ini menggunakan kaedah kualitatif dengan menganalisis sumber primer dan sekunder seperti peta, laporan tahunan, temu bual dan lain-lain. Hasil dapatan kajian menunjukkan bahawa pertumbuhan ekonomi luar bandar khususnya dalam aspek pembangunan kesejahteraan masyarakat pada keseluruhannya adalah sangat positif. Dapatan kajian juga mendapati taraf hidup masyarakat Melayu luar bandar di Melaka meningkat dimanifestasikan melalui penglibatan dalam ekonomi komersil. Situasi ini jelas dapat dilihat pada era kemerdekaan iaitu kadar peratusan kemiskinan menunjukkan penurunan dan pemilikan keluasan tanah bagi masyarakat Melayu semakin meningkat. Kesimpulannya, kajian ini menunjukkan bahawa pemerintahan kolonial sememangnya telah mengubah corak ekonomi di tanah Melayu melalui dasar dualisme iaitu pengekalan kegiatan ekonomi tradisional untuk masyarakat Melayu dan dalam masa yang sama memperkenalkan ekonomi komersil bagi kaum lain. Hanya selepas Tanah Melayu memasuki era kemerdekaan baharu masyarakat Melayu berpeluang melibatkan diri dalam ekonomi komersil. Implikasi kajian ini memberi sumbangan yang penting kepada masyarakat di Malaysia dalam konteks untuk memahami kesan daripada penjajahan Barat terhadap kegiatan ekonomi masyarakat Melayu di negeri Melaka hingga era kemerdekaan.

Kata kunci: Sosioekonomi, pertanian, masyarakat Melayu, luar bandar

Abstract

The objective of this study was to groove the development of the agricultural economy of the Malays in Malacca starting traditional to Malaya achieved independence. This study will trace the three main eras, namely before independence, during colonial rule and after independence. This study will discuss the changes in the socio-economic structure of the Malay community before and after colonial rule. This study uses qualitative methods by analyzing primary and secondary sources such as maps, annual reports, interviews and

others. The results of the study show that the growth of the rural economy, especially in the aspect of development of community well-being as a whole is very positive. The study also found that the standard of living of rural Malay community is manifested through increased involvement in the commercial economy. This situation can clearly be seen in the era of independence, which showed a decrease in poverty rates and the percentage of ownership of land for growing the community. In conclusion, this study shows that the colonial administration certainly has changed the economy in the Malay world through basic dualism of retention of traditional economic activity for the community and at the same time introduce a commercial economy to another race. Only after entering the era of the Malay ground that new independence of the Malay community had the opportunity to engage in a commercial economy. The implications of this study provide an important contribution to society in the context to understand the impact of Western colonialism on economic activities of the Malay community in the state of Malacca to the independence era.

Keywords: Socioeconomic, agricultural, Malay community, rural.

PENGENALAN

Kegiatan ekonomi merupakan aspek penting dalam mengukur kemajuan sesebuah negara. Kemajuan ekonomi menjadi cerminan kepada masyarakat yang hidup dalam negara tersebut. Ini membawa pengertian bahawa semakin maju kegiatan ekonomi dalam sesebuah negara maka semakin tinggi taraf hidup masyarakatnya. Masyarakat Melayu awal Melaka menjalankan kegiatan ekonomi tradisional. Ekonomi tradisional merujuk kepada aktiviti untuk keperluan sendiri, dijalankan secara kecil-kecilan dan menggunakan peralatan tradisional seperti cangkul. Kegiatan ekonomi tradisional yang dijalankan pula seperti bercucuk tanam iaitu menanam padi dan tanaman sampingan seperti ubi, pisang dan kelapa. Selain itu, masyarakat Melayu juga menjalankan kegiatan memungut hasil hutan, menangkap ikan dan memelihara binatang seperti ayam, itik, lembu dan kerbau. Melaka merupakan sebuah negeri yang penuh dengan nilai sejarah melalui episod penjelajahan dan penjajahan kuasa barat. Kemasukan kuasa kolonial telah menjadi titik tolak kepada bermulanya ekonomi *dualisme*. Sistem ekonomi baharu ini telah membawa kepada kemasukan kaum lain ke Tanah Melayu bagi tujuan menjadi buruh kasar. Kaum Cina dan India dibawa masuk ke Tanah Melayu bagi mengusahakan perlombongan bijih timah dan perusahaan getah.

Oleh kerana bijih timah banyak terdapat di kawasan lombong yang kemudiannya berkembang menjadi bandar, maka ramai orang Cina menetap di kawasan bandar. Sementara itu kaum India pula lebih tertumpu untuk tinggal di kawasan estet atau ladang getah. Manakala orang Melayu terus kekal dengan petempatan di luar bandar dan menjalankan kegiatan ekonomi sara diri sama seperti sebelum pemerintahan kolonial. Objektif makalah ini adalah untuk membincangkan kesan pemerintahan kolonial Barat terhadap kegiatan ekonomi masyarakat Melayu di negeri Melaka hingga menjelang era kemerdekaan.


LATAR BELAKANG

Perubahan corak ekonomi di Melaka bermula dengan kedatangan Portugis pada tahun 1511, kemudian diikuti pula penjajahan oleh kuasa Belanda pada tahun 1641 dan seterusnya British sehingga tanah Melayu mencapai kemerdekaan. Perubahan corak ekonomi jelas dapat dilihat semasa pemerintahan British. British telah memperkenalkan sistem ekonomi *Dualisme* iaitu terdapat dua corak ekonomi di tanah Melayu iaitu 'ekonomi tradisional' dan 'ekonomi komersil'. Ekonomi tradisional telah diamalkan semasa zaman awal sebelum penjajahan Barat di Tanah Melayu. Manakala ekonomi komersil pula merujuk kepada pengenalan sistem mata wang dan kewujudan pasaran untuk menjual hasil ekonomi. Di samping itu penggunaan kaedah serta peralatan yang lebih moden seperti mesin atau jentera bagi mendapatkan hasil yang lebih banyak dan keuntungan yang lebih tinggi. Masyarakat Melayu tidak diberikan peluang untuk melibatkan diri dalam ekonomi komersil. Sebaliknya masyarakat Melayu terus dibiarkan kekal menjalankan ekonomi tradisional dengan bercucuk tanam. British sengaja ingin mengekalkan kontak sosial orang Melayu sebagai petani. Sistem ekonomi

komersil hanya menguntungkan kaum imigran dan kawasan bandar diberikan keutamaan kerana mempunyai potensi ekonomi yang lebih baik daripada kawasan luar bandar yang diduduki oleh masyarakat Melayu. Maka tidak hairanlah jika ekonomi tradisional telah berakar umbi dalam masyarakat Melayu sejak zaman sebelum merdeka lagi.

Kemiskinan masyarakat Melayu luar bandar dipengaruhi oleh dua faktor utama iaitu peraturan pemilikan tanah dan perkembangan ekonomi *dualisme*. Pemilikan Tanah di Melaka dipengaruhi oleh tiga faktor utama. Pertama adalah faktor sejarah yang berkaitan dengan kesan ke atas sistem pemilikan tradisional akibat penyusunan pentadbiran wilayah oleh Belanda (1641-1824) dan British (1824-1957). Kedua, terdapat penduduk khususnya di kawasan Naning yang berpegang kepada Adat Naning iaitu adat yang menyerupai Adat Perpatih yang diamalkan oleh orang Melayu di Negeri Sembilan; dan ketiga faktor kepelbagaian akta, ordinan dan peraturan berkaitan tanah dan pencukaian tanah yang diterapkan oleh British berpunca daripada ketidakfahaman sepenuhnya terhadap sistem dan prinsip pemilikan tanah setempat. Sistem dan prinsip pemilikan tanah dan pengutipan hasil pertanian yang diamalkan oleh orang Melayu di Melaka berasal daripada struktur ekonomi zaman Kesultanan Melayu Melaka yang berpegang kepada Adat Temenggong. Struktur ekonomi orang Melayu pada zaman Kesultanan Melayu Melaka bercirikan Sistem Feudal. Golongan pemerintah menguasai pemilikan tanah dan hasil pertanian, manakala golongan yang diperintah bertindak sebagai agen pengeluaran hasil pertanian. Cukai ke atas hasil pertanian, khususnya padi, dikenakan cukai sebanyak sepersepuluh daripada hasil yang diperoleh bagi satu kawasan tanah yang diusahakan. Prinsip yang digunakan dalam pengutipan cukai itu disandarkan kepada kaedah pencukaian Islam jenis *Uḥ* (Lugiman Abu Seman 2004). Sama seperti zakat, cukai *Uḥ* ini dikenakan ke atas hasil pertanian daripada penggunaan tanah oleh para petani. Cukai ini hanya wajib dibayar apabila tanah yang diusahakan mengeluarkan hasil atau produktiviti. Jadi sekiranya tanaman yang diusahakan musnah akibat bencana alam atau penyakit, maka cukai tadi tidak akan dikenakan.

Sistem politik dan ekonomi di negeri Melaka pada zaman itu telah mewujudkan perbezaan kelas ekonomi antara golongan pemerintah dengan golongan yang diperintah. Perbezaan ini telah menyebabkan golongan rakyat menjadi miskin kerana kegiatan ekonomi dikawal oleh golongan pemerintah. Terbentuk satu sistem sosial masyarakat Melayu Melaka yang terbelenggu dengan masalah kemiskinan kesan daripada politik dan ekonomi yang diamalkan di Melaka atau lebih dikenali sebagai Sistem Feudal. Dalam sistem ini, sultan berkuasa ke atas yang merupakan unit politik yang paling besar di bawah pemerintahannya (Sity Daud & Zarina Othman 2005). Jurang ekonomi antara rakyat dengan golongan pemerintah yang berteraskan kepada ekonomi politik semakin luas apabila golongan pemerintah diampu kedudukan ekonomi mereka oleh elit pengusaha, peniaga dan pedagang bukan Melayu yang aktif dalam ekonomi komersil di Melaka. Rajah 1 menunjukkan Sistem Feudal yang dilaksanakan di Kesultanan Melayu Melaka sebelum dikuasai oleh Portugis. Dalam sistem ini, sultan mempunyai kedudukan tertinggi dan mempunyai kuasa terhadap ekonomi. Sultan dibantu oleh pembesar dan penghulu.



Rajah 1. Sistem Feudal di Melaka.

Sumber: Shaharuddin Maaruf 2014

KEMASUKAN KUASA BARAT DAN ERA PENJAJAHAN

Penjajahan Melaka bermula pada tahun 1511 oleh Portugis selama 130 tahun sebelum Melaka ditakluki oleh Belanda pada 1641. Belanda telah berjaya menawan Melaka selama 154 tahun sebelum digantikan pula dengan kuasa British pada 1795. Pada tahun 1942, Jepun telah menjajah Melaka sebelum berjaya diambil alih semula oleh pemerintahan British setelah Jepun menyerah kalah pada tahun 1945. Penjajahan kuasa Barat di Tanah Melayu ternyata memberi kesan yang amat kritikal khususnya terhadap struktur sosioekonomi dan masyarakat Melayu di negeri Melayu.

Pemerintahan Portugis

Pemerintahan Kesultanan Melayu Melaka berakhir semasa pemerintahan Sultan Mahmud Syah pada tahun 1511 (Buyong Adil 2020). Pada ketika itu, Melaka telah jatuh ke tangan Portugis setelah Kesultanan Melaka memerintah selama 110 tahun. Kegemilangan Melaka sebagai pusat perdagangan yang maju sekitar abad ke-15 dan ke-16 telah menarik perhatian Raja Portugal Manuel I untuk menawan Melaka. Kemajuan ini disebut dalam *Duarte Barbosa* iaitu sesiapa yang menguasai Melaka, dia dapat menguasai perdagangan dunia. Antara faktor yang menyebabkan kemajuan Melaka adalah kedudukan geografi yang strategik. Pelabuhan Melaka merupakan persimpangan jalan laut antara dua tamadun besar iaitu China dan India. Tambahan pula, Melaka juga terlindung daripada tiupan angin monsun timur laut dan barat daya (Izzuddin Al Jitrawiy 2019). Keadaan ini menjadikan pelabuhan Melaka sebagai tempat yang selamat untuk para pedagang dari Arab, Jawa, India dan China berlindung sehingga keadaan selamat untuk meneruskan pelayaran. Selain itu, Melaka juga merupakan pusat perdagangan rempah bagi para pedagang untuk memasarkan rempah masing-masing.



Peta 1. Peta Lama Negeri Melaka

Sumber: David Rumsey Historical Map Collection. Presqu'île de Malacca. Oceanique no. 12. Vandermaelen, Philippe, 1795-1869.

Titik tolak siri penjelajahan dan usaha menakluki Melaka dimulakan oleh Diogo Lopes de Sequeira dengan cubaan mengadakan hubungan perdagangan dengan Melaka. Pada ketika itu perdagangan rempah dimonopoli oleh saudagar Islam dan orang Portugis ingin memecahkan monopoli perdagangan rempah yang dikuasai oleh saudagar Islam. Tambahan pula, orang Portugis sememangnya telah lama memusuhi orang Islam sejak kekalahan teruk dalam Perang Salib pada kurun ke-12. Kedatangan orang Portugis ke Melaka bukan sahaja untuk menguasai perdagangan di Melaka malah ingin menghancurkan kerajaan Islam di kawasan timur serta menyebarkan ajaran agama

Kristian. Peristiwa peperangan berlaku apabila Sultan Mahmud memerintahkan semua orang Portugis ditangkap kerana menganggap orang Portugis sebagai musuh Islam. Lanjutan daripada peristiwa tangkapan tersebut telah menyebabkan Portugis menyerang Melaka. Serangan tersebut diketuai oleh Alfonso de'Albuquerque yang merupakan seorang gabenor dan ketua nakhoda Portugis. Akhirnya, pada tahun 1511 Malaya berjaya ditawan oleh Portugis dan berakhirnya keagungan dan keunggulan Kerajaan Kesultanan Melayu Melaka. Alfonso de'Albuquerque telah membina kubu pertahanan selepas berjaya menawan Melaka yang dikenali sebagai *Fortaleza De Malaca*.



Gambar 1. Kota Melaka
Sumber: D.G.E. Hall (1981)

Pada zaman penguasaan Portugis, struktur ekonomi masyarakat Melayu belum terganggu kerana penguasa Portugis kurang melaksanakan pentadbiran wilayah. Usaha memulihkan semula ekonomi di Melaka dimulakan dengan menggalakkan semula para pedagang datang berdagang semula di Melaka. Bagi meningkatkan ekonomi, Portugis memperkenalkan sistem mata wang baru dalam bentuk timah, tembaga, perak dan emas. Portugis telah mengambil alih perdagangan rempah yang sebelum ini dikuasai oleh pedagang Islam dan menguasai pelabuhan di Melaka selama 130 tahun sebelum Melaka ditakluki oleh Belanda pada 1641. Selain menguasai ekonomi di Melaka, orang Portugis juga telah menyebarkan agama Kristian di Melaka dan memaksa orang Melayu memeluk agama Kristian secara paksa.

Pemerintahan Belanda

Belanda berjaya menguasai Melaka pada tahun 1641 dengan adanya kerjasama daripada Johor. Menurut Valentyn dalam *Journal of the Straits Branch of the Royal Asiatic Society*, terdapat dalam persetujuan awal antara Belanda dan Johor yang menyentuh hak penguasaan ke atas wilayah Melaka (Hervey 1884). Belanda disebutkan sebagai menguasai kawasan bandar Melaka dan Johor akan menguasai wilayah luar bandar. Belanda dibolehkan untuk melebarkan kawasaannya bagi mendapatkan perbekalan asas seperti kayu api, bahan binaan dan bahan makanan. Namun persetujuan seperti yang dinyatakan oleh Valentyn itu, menurut T.J. Newbold dalam bukunya *Political and Statistical Account of the British Settlements in the Straits of Malacca* yang meneliti sumber Belanda yang masih terdapat di Melaka pada awal pendudukan British di Melaka, tidak mengikat Belanda daripada meluaskan kawasaannya kerana beberapa persetujuan lain melenyapkan persetujuan yang disebut oleh Valentyn itu (Newbold 1971).

Nordin Hussin dalam bukunya, *Trade and society in the straits of Melaka: Dutch Melaka and English Penang, 1780-1830* menyatakan pada keseluruhannya, penguasa Belanda di Melaka hanya melakukan penguasaan wilayah secara tidak langsung (Nordin Hussin 2007). Walaupun pada awal pendudukan Belanda di Melaka ada cadangan untuk memajukan kawasan pedalaman Melaka, tetapi tiada tindakan yang dilaksanakan. Urusan ke atas kawasan luar pusat pentadbiran diserahkan kepada tuan tanah yang diberi lesen pajakan untuk mengurus dan mentadbir tanah tersebut. Pemajakan dalam saiz yang besar diperoleh oleh orang Belanda seperti Adrian Koek, de Wind dan Westerhout, orang keturunan kacukan Belanda-Asia, tauke Cina dan kaum bukan Melayu lainnya. Keluasan tanah yang dipajakkan sebagai estet kepada J.B. de Wind misalnya adalah sebanyak 280 batu persegi yang mencakupi sebahagian kawasan selatan Sungai Kesang hingga ke sempadan Melaka dengan Muar. Beliau kemudiannya pada tahun 1752 memajak pula kawasan Pungor atau disebut sebagai Melaka Lama yang meliputi kawasan tepi pantai sepanjang sekitar dua batu bermula dari Sungai Duyong hingga ke Tanjung Palas. Seterusnya pada bulan Januari 1753 de Wind memajak pula kawasan yang menganjur di bahagian tepi pantai sepanjang kira-kira enam setengah batu bermula dari Tanjong Palas hingga ke Sungai Serkam. Keluasan tanah yang dipajak oleh J.B. de Wind menggambarkan tahap pemilikan yang mampu diperoleh oleh kenamaan Belanda lain seperti Adrian Koek, Westerhout, dan lain-lainnya. Pemilikan secara pajakan itu juga diberi kepada orang bukan Belanda, seperti orang keturunan Keling, Arab, China, kacukan Belanda-Asia dan Melayu. Bezanya ialah pemilikan kenamaan Belanda jauh lebih besar dari pemilikan kaum lain seperti kawasan yang dimiliki oleh Kapten Melayu Abu Bakar, Mohammad Tahir dan Seva Sangra. Kawasan yang dimiliki oleh Kapten Melayu Abu Bakar dan keluarganya misalnya, meliputi keluasan satu setengah batu sahaja di Batu Ampa [Batu Hampar]. Kawasan ini terletak di pinggir bandar Melaka iaitu di tebing sungai Melaka dan berdekatan Bukit Peringgit dan Pengkalan Rama. Kawasan ini giat diusahakan pertanian padi dan mempunyai penduduk yang ramai. Pemilikan tanah oleh Mohammad Tahir pula meliputi kawasan seluas dua setengah batu persegi. Sebahagian daripada kawasan ini juga giat di tanam dengan padi. Manakala pemilikan tanah oleh Kapten Keling Seva Sangra, yang terletak di tebing kiri Sungai Melaka juga tidak luas (Nordin Hussin 2007).

Pemilikan dalam saiz kecil itu memberi keupayaan yang lebih baik untuk pembangunannya berbanding pemilikan yang terlalu luas. Sebahagian kecil sahaja kawasan daripada pemilikan yang luas itu mampu diteroka kerana kekurangan modal, buruh, jalan perhubungan dan masalah pasaran sehingga merencatkan pembangunan tanah dan pertanian di kawasan pinggir bandar dan kawasan pedalaman. Pemilikan yang luas juga sukar ditentukan sempadannya sehingga timbul masalah pertelagahan berkaitan sempadan kawasan antara pemilik. Hal ini juga menjadi penyebab kepada sebilangan kawasan tidak bebas untuk diusahakan. Satu contoh pertelagahan pemilikan itu berlaku ke atas tanah yang terletak dalam Kelebang Besar hingga ke Tanjung Bruas pada 1770-an. Kawasan ini dimiliki oleh Syed Hussin dan ditadbir oleh Kapten Melayu ketika itu Encik Aroe sejak 1770. Sebahagian kawasan ini yang melebar dari Duyong ke Hujung Pasir dijalankan pertanian padi. Pada tahun 1788 timbul pertelagahan apabila Adrian Koek menuntut tanah di Batang Tiga yang terletak di dalam kawasan yang dikendalikan oleh Encik Aroe sebagai miliknya. Pertelagahan itu diselesaikan di mahkamah dan pihak mahkamah tanpa mengambil pertimbangan sewajarnya kepada rekod pemilikan asal kawasan itu telah memihak kepada tuntutan Adrian Koek (Nordin Hussin 2007).

Dasar pentadbiran Belanda yang mengutamakan tuntutan dan pemilikan tanah sedemikian itu mengakibatkan kawasan pegangan orang Melayu dan orang kebanyakan lain jatuh kepada pegangan orang yang berpengaruh. Tuan-tuan tanah itu biasanya menyewakan tanah mereka untuk dikerjakan. Kutipan sewaan dan juga hasil yang pengeluaran ekonomi itu digunakan bagi membayar pajakan tanah mereka kepada pentadbiran Melaka. Kekurangan jalan perhubungan dan infrastruktur yang lain di samping kelemahan faktor-faktor ekonomi pengeluaran menyebabkan pembangunan tanah dan pertanian pada waktu pentadbiran Belanda tidak begitu berkembang. Kawasan pedalaman masih tidak begitu dibangunkan kerana kesukaran perhubungan kecuali kawasan yang ada perhubungan sungai. Kawasan pedalaman yang mempunyai sumber asli yang tinggi nilainya, seperti emas, bijih timah serta kayu kayan dan rotan yang dihubungkan oleh jalan sungai sahaja yang diteroka.

Bagi masyarakat Melayu pada ketika itu yang ramai hidup di perkampungan di pinggir bandar mereka ditadbir secara tradisional Melayu yang terus melestarikan corak kehidupan tradisional mereka. Aktiviti ekonomi kebanyakan mereka adalah pertanian padi. Pentadbiran Belanda bertindak mengekalkan sistem perkampungan tradisional itu dengan menetapkan setiap 44 keluarga berhak ditadbir oleh seorang penghulu dan mengadakan sebuah masjid berserta pegawainya seperti imam, khatib dan bilal (Nordin Hussin 2007). Di kawasan perkampungan di pinggir pusat pentadbiran dan pedalaman, penghulu dipertanggungjawabkan dalam usaha pengeluaran dan mengutip cukai di kawasan masing-masing. Matlamat Belanda berbuat demikian adalah untuk meringankan kos dan urusan pentadbiran serta mengharapkan wujudnya keadaan aman dalam masyarakat Melayu. Situasi aman yang diharapkan itu akan memberi peluang kepada masyarakat Melayu terus mengerjakan pertanian mereka dan Belanda akan mampu mengutip cukai dengan lumayan. Namun harapan Belanda itu tidak menjadi realiti berterusan sepanjang penguasaannya ke atas Melaka. Pada tempoh tertentu terdapat keengganan atau penentangan orang Melayu terhadap pentadbiran Belanda, terutamanya daripada kalangan orang Nanning, yang mendiami kawasan pedalaman Melaka (Abdul Latip Talib 2009).

Nanning yang kini diserap ke dalam daerah Alor Gajah mempunyai sejarah istimewa dalam sejarah Melaka. Kawasan ini yang terletak arah utara kira-kira 40 kilometer dari bandar Melaka dan bersempadan dengan Rembau dalam Negeri Sembilan, didiami oleh orang Melayu dari Minangkabau, Sumatera, sejak zaman kesultanan Melayu Melaka lagi. Asalnya kawasan ini merupakan sebuah negeri yang membentuk Negeri Sembilan tetapi seperti juga kawasan lain di selatan Negeri Sembilan dipengaruhi perjalanan politiknya oleh Johor. Apabila Belanda menguasai Belanda dan menerusi beberapa persetujuan Belanda dengan Johor, kawasan ini menjadi kawasan yang boleh diuruskan oleh Belanda seperti yang pernah diamalkan oleh Portugis. Penduduknya berpegang kepada Adat Perpatih dan menjalankan kegiatan pertanian padi (Hooker 1972). Adat Perpatih mempunyai kaedah pewarisan harta dan hubungan kesukuan yang berbeza daripada kebanyakan orang Melayu Melaka yang tinggal di bandar Melaka dan persekitarannya yang mengamalkan Adat Temenggong. Struktur pentadbiran kawasan Nanning pada waktu itu tidak bersandarkan kepada persempadanan fizikal tetapi lebih bersandarkan kepada Luak Suku. Kelainan ini menyebabkan wujudnya masalah hubungan antara pihak pentadbiran Belanda, dan begitu juga berikutnya semasa penguasaan British di Melaka (Hooker 1972).

Seawal penguasaan Belanda ke atas Melaka pada tahun 1641 terdapat persetujuan kesetiaan para ketua Nanning serta perkampungan persekitarannya kepada pentadbiran Belanda di samping menamatkan perjanjian yang dibuat antara Nanning dengan Portugis dan Sepanyol. Berkaitan dengan harta peninggalan orang yang tidak ada waris, maka harta itu akan dibahagikan antara ketua-ketua Nanning dengan pentadbiran Belanda. Manakala dari segi kutipan hasil, pentadbiran Belanda meminta supaya 1/10 hasil keluaran dan sepuluh peratus dari penjualan tanah atau harta diserahkan kepada pentadbiran Belanda (Newbold 1971). Pada tahun 1642 Belanda telah melantik seorang Penghulu bagi seluruh Nanning dan jawatan itu diberikan kepada suku Biduanda. Jawatan ini kemudiannya jatuh kepada suku Semelenggang yang terus memegangnya hingga ke hari ini. Campur tangan dalam sosiopolitik dan ekonomi, khususnya tuntutan cukai ke atas Nanning tidak disenangi oleh penduduknya. Cukai pertanian sepersepuluh yang dituntut oleh Belanda enggan dipatuhi. Beberapa siri penentangan ke atas kuasa pentadbiran Belanda wujud sepanjang penguasaan Belanda di Melaka (Newbold 1971). Pada penghujung penguasaan Belanda, Nanning tidak menghantar sepersepuluh hasil pertanian kepada pentadbiran Belanda, sebaliknya memberi sejumlah 400 gantang padi sahaja. Namun perubahan yang sangat ketara terhadap Nanning khasnya dan orang Melayu Melaka amnya berlaku apabila kolonial British menguasai Melaka dari 1825 hingga 1957.

Pemerintahan British

Pada permulaan penguasaan British di Melaka, dasar pengurusan wilayah dan pencukaian adalah penerusan kepada amalan yang dilaksanakan oleh Belanda sebelumnya. Nanning juga terus menyerahkan 400 gantang padi sebagai gantian kepada bayaran kutipan 1/10 hasil tuaian padi Nanning pada tempoh awal penguasaan British di Melaka. Keengganan Nanning mematuhi tuntutan cukai sepersepuluh itu tidak dapat diterima oleh pihak British kerana British memerlukan pendapatan dari

cukai pertanian setelah cukai am kastam dihapuskan (Kratoska 1983). Pentadbiran British, berdasarkan kepada pengalaman mereka di India, menganggap keengganan Naning itu mencabar legitimasi penguasaan mereka ke atas Melaka. Bagi menerapkan legitimasi dan kuasa kedaulatannya terhadap wilayah dan perdagangan di Melaka maka Piagam Keadilan dilaksanakan seperti amalannya di India. British juga berpegang kepada prinsip bahawa dirinya sebagai pengganti kepada pemerintah tradisional setempat berhak mendapat semua hak yang pernah diterima atau dikuatkuasakan oleh pemerintah tradisional itu.



Peta 2. Melaka dan Negeri-negeri Melayu
Sumber: G P Dartford (1961)

Pendirian kepada prinsip itu maka pada tahun 1828 pihak British mula menerapkan pentadbiran tanah yang sama bagi Naning seperti yang dilaksanakan bagi kawasan lain di Melaka. Pembayaran cukai padi khususnya mestilah mengikut pengiraan sepersepuluh daripada hasil pengeluaran padi. Pelaksanaan pencukaian sedemikian yang tidak mengambil kira situasi pengeluaran pada sesuatu maka timbullah penentangan yang membawa kepada berlakunya Perang Naning pada tahun 1831-32 (Kratoska 1983). Kekalahan Naning dalam perang itu menyebabkan pentadbiran Naning disusun semula. Kuasa tradisional penghulu dan Ampat Suku di Naning ditamatkan, sebaliknya pentadbiran diletakkan ke bawah 15 penghulu yang menguasai mukim masing-masing. Keseluruhan pentadbiran Naning itu diletakkan di bawah bidang kuasa seorang penguasa pentadbiran British (Kratoska 1983). Perubahan pentadbiran ke atas Naning itu dan pelaksanaan sistem pemilikan tanah yang sama bagi seluruh pegangan tanah, mencetuskan pelbagai kesan kepada pemilikan tanah dalam kalangan orang Melayu di Melaka amnya dan Naning khususnya.

Pada akhir tahun 1830-an pihak British melantik Pesuruhjaya Tanah William W. Young bagi merencanakan proses pencukaian tanah di Negeri-negeri Selat (Dodwell and Miles 1839). Bagi tujuan itu beliau ditugaskan menyelesaikan masalah pemilikan dan persempadanan pemilikan tanah serta urusan pemberian dan pencukaian tanah yang baru dikeluarkan. Akta Tanah 1839 atau dirujuk sebagai Akta India 16, 1839 yang dikeluarkan oleh Majlis Legislatif India menerima sebahagian daripada perencanaan Pesuruhjaya Young, tetapi perencanaan itu tidak memberi kaedah konkrit bagi

penyelesaian masalah tanah yang telah dimiliki atau dipegang sebelumnya. Pesuruhjaya Young juga mencadangkan supaya pencukaaian 1/10 yang seiras seperti zakat ditukar menjadi cukai tanah yang tetap yang dibayar secara tunai pada kadar sepuluh peratus hasil keluaran kasar sesuatu tanah. Akta ini yang berkuat kuasa dari 1840 hingga 1886 melaksanakan cadangan pencukaaian oleh Pesuruhjaya Young itu tetapi pertukaran pencukaaian daripada bentuk zakat kepada cukai tetap itu adalah secara sukarela sahaja. Proses pertukaran secara sukarela ini yang berjalan kira-kira 20 tahun tidak mendapat sambutan kerana pembayaran cukai tanah secara tetap lebih mahal berbanding dengan amalan lama. Oleh kerana sambutan yang tidak menggalakkan itu dan kesukaran pentadbiran tanah menangani tanah adat, maka menerusi Akta India XXVI 1861, peraturan tanah adat itu dihapuskan bagi tanah yang baru diteroka. Tanah dalam bentuk pegangan tanah adat sebelum Akta ini dilaksanakan dikekalkan statusnya sebagai tanah adat (Hooker 1972).

Pentadbiran British di Melaka pada peringkat awal melaksanakan pemilikan kekal atau *fee simple* kepada pemilikan tanah baru dan pemilikan tanah yang ada keterangan rekod tanah dalam pentadbiran Belanda dan apabila didaftarkan ke dalam pentadbiran tanah British Melaka. Masalah yang timbul ialah kebanyakan pegangan ke atas tanah tidak mempunyai bukti kuat daripada rekod atau surat yang dapat mengesahkan sesuatu pegangan. Bagi pemilikan yang tidak dapat disahkan dengan kukuh maka pegangan mereka menurut kuat kuasa *Malacca Ordinance VIII*, 1886, diberi taraf berkanun, iaitu *statutory*. Pegangan ini lebih merupakan pemilikan yang bersifat pajakan selama antara 25 hingga 999 tahun kerana pentadbiran British di Melaka tidak mahu lagi pemberian tanah secara pegangan kekal seperti amalan pada peringkat awalnya. Kebanyakan pegangan kecil orang Melayu di kampung tidak mempunyai rekod kerana pegangan mereka lebih bersandarkan kepada sistem pegangan cara tradisional. Pegangan ke atas tanah dalam kalangan orang Melayu bukan berbentuk pemilikan “rights to own” tetapi lebih kepada sifat hak menggunakan tanah “rights to use” sahaja. Masalah pegangan orang Melayu ini disedari oleh pihak British dan bagi kebaikan orang Melayu dan juga pentadbiran British, maka menerusi *Malacca Ordinance VIII*, 1886 itu, kuasa pemilikan mereka disandarkan kepada peraturan pegangan tanah adat khususnya bagi tanah dalam pegangan Adat Naning dan pegangan orang Melayu Melaka amnya yang diberi tanah sebelumnya oleh pentadbiran British. Menerusi peruntukan peraturan tanah adat orang Melayu Melaka berpeluang mendapatkan tanah mengikut keupayaan pemohon mengerjakannya terhad kepada maksimumnya sepuluh ekar. Tanah dalam bentuk milik ini jika dijual kepada orang luar maka hilanglah taraf tanah itu sebagai tanah pegangan adat (Hooker 1972). Akta ini juga menetapkan pemilikan tanah mengikut geran yang dikeluarkan oleh Belanda dan Tanah Adat yang ada perakuan hak pegangannya pada waktu British mengambil Melaka diisytiharkan hak pegangan itu sah selagi pemegang itu mendiami dan mengerjakannya. Kedua bentuk pegangan ini ditukar kepada bentuk hak milik kekal.

Pada tahun 1880-an juga sebagai memperkukuhkan lagi legitimasi pentadbiran British di Melaka maka dikuatkuasakan ke seluruh negeri Melaka penetapan sempadan negeri Melaka, wilayah atau daerah dan mukimnya melalui peraturan “*Boundries and Survey Map Ordinance, 1882* dan memperkenalkan sistem pentadbiran mukim pada tahun 1887 melalui Akta Senarai Daftar Mukim (*Entry Mukim Register Act*) (The Law of the Straits Settlements 1835-1900). Pengenalan sistem pentadbiran kawasan yang baru ini perlu ditadbir urus supaya difahami dan diterima oleh penduduk Melaka. Seorang Pegawai Penempatan Sempadan (*Demarcation Officer*) dilantik bagi tujuan tersebut dan bertanggungjawab juga ke atas masalah tanah di setiap mukim.

Penyusunan sempadan daerah dan mukim telah membahagikan wilayah negeri Melaka kepada daerah dan mukim seperti yang wujud sekarang. Negeri Melaka mempunyai keluasan 1,650 km persegi dan dibahagikan kepada tiga daerah iaitu daerah Melaka Tengah yang meliputi bandar Melaka dan persekitarannya, daerah Melaka Utara atau dikenali sebagai daerah Alor Gajah dan daerah Melaka Selatan yang dikenali sebagai daerah Jasin. Daerah Jasin mempunyai keluasan terbesar iaitu 676 km persegi, diikuti daerah Alor Gajah iaitu 660 km persegi dan daerah Melaka Tengah iaitu 300 km persegi (Ang Kean Hua 2015).



Peta 3. Peta Negeri Melaka
Sumber: Data Asas Negeri Melaka (2011)

Pembentukan struktur pentadbiran daerah dan mukim ini meningkatkan potensi menambah pendapatan pentadbiran British menerusi cukai hasil dan cukai tanah. Kadar cukai tanah yang dikenakan adalah mengikut kategori tanah daripada yang baik, sederhana dan rendah mutunya. Tanah yang baik atau kelas satu, dikenakan cukai sebanyak 80 sen, manakala tanah sederhana baik atau kelas dua, sebanyak 50 sen, dan bagi kelas ketiga iaitu tanah yang kurang baik dikenakan cukai sebanyak 30 sen (D.O.J 140/87 (Report of the Mukim Sungai Rambai 29.7.1887); dan Lugiman b. Abu Seman Abu Seman). Kadar ini dikenakan pada kiraan setiap 1,000 depa persegi. Bagi tanah padi yang produktif cukai yang dikenakan boleh sampai kepada 120 sen. Cukai tanah ini perlu dibayar oleh semua pemegang tanah termasuk golongan bangsawan walaupun sesuatu tanah itu digunakan ataupun tidak atau hanya digunakan untuk tujuan semeaian padi sahaja. Urusan pencukaian dikendalikan di beberapa buah rumah tol yang dibina di beberapa mukim atau di pejabat tanah. Malah pentadbiran British menggunakan pengaruh penghulu untuk memastikan pembayaran cukai dilangsungkan dan pada keperluan tertentu, pentadbiran British juga memperkenalkan sistem kutipan bergerak. Perluasan serta penguatkuasaan pentadbiran Inggeris dalam pencukaian hasil pertanian dan cukai tanah membebankan orang Melayu yang kebanyakannya bergiat dalam pertanian padi. Malah peningkatan bilangan penduduk Melayu di bandar Melaka dan pinggirnya bertambah dengan pesat dan sudah pun berjumlah 13,988 orang pada tahun 1817 yang merupakan 71 peratus daripada jumlah keseluruhan penduduk menyukarkan lagi kehidupan orang Melayu di kawasan itu (Diane Kraal & Jeyapalan Kasipillai 2014).

Bebanan cukai yang dihadapi oleh petani Melayu Melaka menyebabkan berlakunya penggadaian tanah atau peninggalan tanah dan mencetuskan penghijrahan ke kawasan luar bandar atau mendapatkan kerja tambahan selain bercucuk tanam di kawasan bandar. Bagi orang Melayu yang tinggal di kawasan luar bandar seperti di daerah Alor Gajah dan Jasin, wujud keengganan membayar cukai khususnya ke atas tanah yang digunakan untuk penempatan. Dalam mukim Serkam, Jasin, para pemilik tanah di mukim ini mendakwa bahawa kawasan tanah mereka yang kecil yang digunakan sebagai kawasan rumah tidaklah digunakan untuk penghasilan pertanian. Tanah laman rumah itu tidak dikenakan cukai sebelum penguasaan British. Cukai hanya dikenakan mengikut hasil yang diperolehi dari tanah sawah yang diusahakan. Pendirian tidak setuju dengan dasar pencukaian itu akhirnya dimanifestasikan dalam bentuk penentangan terbuka itu yang dikenali sebagai Perang Rokam pada tahun 1887 yang mendapat sokongan dari orang Naning.

Jelas sekali peraturan pemilikan tanah dan pencukaian yang dilaksanakan oleh kuasa kolonial Belanda adalah bagi tujuan mendapatkan hasil pendapatan untuk menampung kos pentadbiran mereka. Bagi tujuan itu amalan pencukaian tradisional Melayu, iaitu pembayaran sepersepuluh hasil tanaman, dikenakan. Walau bagaimanapun masalah kurang faham terhadap aspek pencukaian tradisional itu telah membebankan para petani. Manakala pengenalan peraturan tanah adat pada masa penguasaan British, dari sudut orang Melayu memang membuka peluang kepada mereka memiliki tanah, tetapi bagi pentadbir British ia menjanjikan pencukaian yang lebih baik seperti juga kesannya daripada usaha penyusunan rapi kepada pentadbiran daerah dan mukim. Beban pencukaian ini membawa kepada bermulanya penghijrahan sebilangan orang Melayu dari kawasan bandar dan pinggir bandar ke kawasan pedalaman yang mencetuskan tanah terbiar kepada tanah yang ditinggalkan mereka atau tanah mereka tergadai kepada golongan tuan tanah Melayu yang hartawan. Bibit masalah ekonomi orang Melayu abad ke-20 sudah pun terjadi pada ketika itu dan terus berkembang apabila tumbuh pula ekonomi *dualisme*. Kebanyakan orang Melayu Melaka kekal dengan ekonomi tradisional sedangkan pertanian komersil dan perniagaan serta perusahaan yang diterajui oleh pemodal bukan Melayu giat dilaksanakan mulai awal abad ke-20.

Kegiatan pertanian komersil telah dirintis sejak zaman penguasaan Belanda lagi, namun kegiatan itu tidak berkembang dan tidak berlaku secara berterusan. Kajian Nordin Husin juga mendapati pada 1750-an penguasa Belanda di Melaka menggalakkan penanaman gambir di kawasan pedalaman Melaka. Sebanyak 14,000 pikul dihasilkan pada tahun 1780-1782 dan pengeluarannya meningkat kepada 16,000 pikul pada tempoh 1791-1793 (Nordin Hussin 2007). Aktiviti pertanian gambir di Melaka itu tidak berjalan lama kerana aktiviti ini dianjurkan oleh pihak persendirian terutamanya oleh Adrian Koek, Westerhout dan beberapa tauke Cina yang menggalakkan sebilangan orang Cina membuka tanah di kawasan pedalaman bagi tujuan pengeluaran gambir (Nordin Hussin 2007). Selain gambir, pada penghujung penguasaan Belanda di Melaka, lada hitam juga di tanam oleh orang Cina di kawasan Kesang. Faktor kekurangan modal serta buruh dan kerana kawasan yang sesuai untuk tanaman itu masih belum terbuka luas dari hutan belukar mengekang perkembangannya. Buruh Cina masih tidak ramai kerana kebanyakan orang Cina yang sudah lama berada di Melaka yang menerapkan budaya tempatan sebagai Baba dan Nyonya berkecimpung dalam perniagaan. Galakan daripada pihak penguasa Belanda juga tidak bersungguh-sungguh kerana lebih menumpukan perhatian kepada mendapatkan bijih timah dan perdagangan. Masyarakat Melayu terus kekal menjalankan kegiatan pertanian sara diri seperti penanaman padi secara kecil-kecilan.

Pada masa penjajahan British pun dari tahun 1825 hingga 1850 perkembangan pertanian komersil di Melaka masih lembap. Pada waktu awal penguasaan British tanaman komersil yang utama diusahakan ialah lada hitam. Pada awal tahun 1820an, tanaman ini telah ditanam secara meluas oleh orang Cina (Khoo Kay Kim 1972). Kemasukan orang Eropah telah menyebabkan wujudnya ladang-ladang besar seperti *Appa Katchee's Estate* di Batu Berendam, *J.B. Westerhout's Estate* di utara barat bandar Melaka dan *De Wind's Estate* di sebelah Timur Melaka serta sedikit di Sungai Rambai dan Naning. Perusahaan lada hitam pula mula merosot pada tahun 1826. Sebelum ini, kuantiti yang dihasilkan adalah lebih kurang 6,000 pikul lada hitam tetapi jatuh kepada 4,500 pikul pada tahun berikutnya dan terus jatuh menjadi 4,000 pada tahun 1830. Perusahaan lada hitam dan gambir ini terus merosot di Melaka sehingga dipulihkan semula kegiatannya pada tahun 1860-an. Kemerostan ini berpunca daripada peralihan tumpuan kepada penanaman ubi kayu yang mendapat harga yang baik dalam pasaran. Kemerostan ini juga berpunca daripada penyakit yang mudah menyerang kerana tanaman gambir berdekatan dengan kawasan hutan belukar yang belum cukup dibersihkan. Di samping itu kesukaran untuk mendapatkan buruh kerana buruh Cina lebih bertumpu ke aktiviti perlombongan bijih timah di negeri-negeri Melayu yang lain.

KESAN TERHADAP KEGIATAN EKONOMI ORANG MELAYU DI MELAKA

Penjajahan oleh beberapa kuasa Barat di Tanah Melayu dalam tempoh yang lama telah meninggalkan kesan yang mendalam terhadap pola kegiatan ekonomi khususnya masyarakat Melayu di Melaka. Kesan ini boleh dilihat daripada beberapa aspek seperti berikut;

Aktiviti ekonomi orang Melayu tertumpu kepada sektor pertanian

Kegiatan utama orang Melayu terus tertumpu kepada tanaman padi sawah terutamanya dan dalam jumlah sedikit tanaman padi bukit. Kekalnya orang Melayu dalam pengerjaan tanaman padi bukan sahaja oleh faktor warisan dan keperluan sara diri, tetapi juga disebabkan oleh syarat yang terkandung dalam pegangan tanah adat. Pemegang tanah adat akan hilang pegangannya jika ia gagal memenuhi beberapa syarat yang ditetapkan kepada tanah adat. Antaranya ialah tanggungjawab supaya tanah itu ditanam dengan padi dengan mematuhi peraturan yang dikeluarkan "*Resident Councillor*" dan larangan menanam tanaman yang boleh memiskinkan kesuburan tanah. Sekiranya didapati berlaku pelanggaran kepada ketetapan tersebut selama tiga tahun berturut-turut maka pegangan ke atas tanah itu akan luput (*Small 1940*). Hal ini bertujuan untuk memastikan kegiatan penanaman padi akan terus diusahakan oleh orang Melayu bagi memenuhi keperluan makanan kaum-kaum lain. Tambahan pula, orang Melayu sendiri yang ingin mengusahakan pertanian sara diri kerana mereka menganggap kegiatan pertanian sudah sehati dengan diri mereka. Pihak pentadbiran British dalam usaha mengekalkan tumpuan orang Melayu dalam pertanian padi supaya tidak perlu berbelanja besar mengimport beras. Sehubungan itu usaha dibuat bagi meningkatkan perbekalan beras di Melaka dengan melaksanakan rancangan pengairan dan pengenalan benih padi yang dapat mengeluarkan hasil yang lebih baik. Satu daripada rancangan pengairan yang dibina terletak di mukim Duyong yang memberi manfaat kepada seluas 2,000 ekar sawah (*Small 1940*).



Gambar 2. Pertanian Tradisional di Melaka

Sumber: Arkib Negara Malaysia. No Penerimaan 2001/0051643W
G.21584 (N.797/87)

Faktor yang diuraikan di atas berkaitan dengan kegiatan pertanian orang Melayu dan masalah pemilikan tanah mereka, maka keterlibatan mereka dalam pertanian komersil sehingga awal abad ke-20 sangatlah terhad. Kemajuan yang dicapai oleh orang Cina dalam perladangan getah dan potensi tanaman getah sebagai punca pendapatan atau pulangan dalam bentuk wang tunai yang lumayan, maka orang Melayu mula menceburi kegiatan pertanian getah. Oleh kerana kekangan peraturan yang terdapat dalam tanah adat, maka para pemegang tanah adat mencari atau membuka kawasan hutan untuk mengerjakan tanaman getah. Begitu juga dengan orang Melayu yang mendapati sawah mereka tidak memberi pulangan yang setimpal bertindak meninggalkan atau menjual atau menggadaikan tanah mereka dan beredar ke kawasan pedalaman bagi membuka hutan bagi mengusahakan tanaman getah. Geran diberi kepada hanya terhadap pembukaan tanah hutan simpan kerajaan sahaja. Sebilangan pula pemegang tanah adat mengambil tindakan mengingkari ketetapan yang dikenakan dalam pegangan tanah adat dengan menanam getah di atas tanah mereka (*Barlow 1985*). Sebilangan orang Melayu yang berada mengerjakan penanaman getah ke atas tanah yang mereka beli. Menurut J.H. Drabble, tindakan orang Melayu itu membawa mereka ke dalam aktiviti pertanian komersil, tetapi

sehingga tahun 1938 sedikit sahaja orang yang mempunyai ladang getah, atau kawasan yang melebihi 100 ekar. Sehingga tahun itu bagi seluruh Tanah Melayu, ladang yang dimiliki oleh orang Eropah adalah seluas 206,858 ekar dan keluasan ladang milik orang Asia bukan Melayu adalah 74,693 ekar. Manakala keluasan ladang orang Melayu hanyalah 1,646 ekar. Kebanyakan penglibatan orang Melayu dalam penanaman getah adalah sebagai pekebun kecil (Drabble 1971). Selalunya aktiviti pertanian getah dalam kalangan orang Melayu merupakan aktiviti keluarga sahaja dan dikerjakan tidak dengan rejim kerja yang baik. Malah tanaman mereka tidak begitu dijaga dari diliputi semak dan mudah pula dihinggapai penyakit sehingga kos menguruskan kebun getah mereka sangat tinggi (Young et al. 2000). Pekebun kecil Melayu ini yang mengeluarkan hasil seperti padi, kelapa dan getah secara kecil-kecilan memperoleh pendapatan yang rendah dan tahap kehidupan yang mundur. Hal ini menyebabkan sektor pekebun kecil ini berada pada tahap kemiskinan mutlak. Tahap kemiskinan mutlak dalam sektor pertanian dapat dilihat dari segi kedudukan pendapatan yang diperoleh oleh pekebun kecil dan petani. Pada tahun 1950, pendapatan purata bulanan petani di kawasan luar bandar ialah antara \$60 hingga \$120 sahaja (Mohd Hafiah Piei 1987).

Sektor ekonomi orang Melayu tidak produktif

Sehingga waktu berlakunya Perang Dunia Kedua kedudukan ekonomi orang Melayu berada dalam sektor ekonomi yang tidak produktif yang mengundang masalah kemiskinan dalam kehidupan mereka. Justeru kerana kebanyakan orang Melayu mengerjakan pertanian dan terperangkap dalam kehidupan tradisional mereka maka ciri luar bandar menyelubungi kehidupan mereka walaupun mereka mendiami kawasan berhampiran bandar. Natiyah daripada wujudnya ekonomi dualisme, tradisional dan komersil atau moden mencetuskan jurang ekonomi yang sangat ketara antara kemajuan antara orang Melayu dengan orang bukan Melayu.

Kebanyakan orang Melayu bergiat sebagai pekebun kecil sahaja dalam pertanian komersil berbanding pencapaian orang bukan Melayu yang berjaya membentuk banyak ladang yang luas dan produktif. Para pemilik ladang mempunyai rangkaian yang baik dengan pihak pentadbiran, institusi kewangan, rangkaian perdagangan serta tenaga kerja atau buruh yang banyak membolehkan mereka menempa kemajuan yang lebih baik. Pemerintah kolonial melaksanakan dasar pertanian yang mengutamakan tanaman padi sekadar untuk memenuhi kelangsungan hidup sebagai makanan asas sahaja. Tugas ini diserahkan kepada masyarakat Melayu yang terpaksa akur dengan arahan pemerintah kolonial. Sebaliknya, pengusahaan penanaman pertanian bagi tujuan perdagangan seperti getah pula diberikan tugas kepada pemodal Eropah untuk menjayakannya dengan memberikan layanan yang istimewa dan berbagai-bagai kemudahan bagi membuka ladang getah di kawasan yang subur. Masyarakat Melayu yang rata-ratanya kaum petani dilarang keras dan akan dihukum jika terlibat dengan penanaman getah (Shamsul Amri 1990).

Dasar pertanian kolonial ini telah mewujudkan dua bentuk sektor pertanian iaitu untuk menghasilkan makanan yang diusahakan oleh masyarakat Melayu dan tanaman dagangan yang diusahakan oleh pedagang Eropah. Ternyata masyarakat Melayu terlibat dalam ekonomi pertanian yang tidak produktif jika dibandingkan dengan tanaman dagangan yang bertujuan untuk diekspor bagi mendapatkan pulangan ekonomi yang menguntungkan. Keadaan ini terus menerus meletakkan masyarakat Melayu sebagai petani miskin berbanding dengan kaum lain. Bagi orang Melayu di negeri Melaka, penguasaan kolonial ke atas negeri itu tidak memberi peluang mereka mengorak langkah untuk maju dalam ekonomi. Kolonial Barat telah mencetuskan legasi orang Melayu yang mundur dan sukar diperbetulkan oleh kerajaan yang mengambil alih kuasa pemerintahan menerusi kemerdekaan yang dicapai pada tahun 1957.

Saingan dalam ekonomi ekoran kehadiran Orang Cina

Sejenak menelusuri kedatangan kaum Cina di Melaka bermula sejak kurun ke-15 selepas Laksamana Cheng Ho mengunjungi Melaka. Pada awal abad ke-19, pendatang Cina telah mula berpindah ke Tanah Melayu berikutan penemuan bijih timah di Linggi, Melaka (Comber 2007). Kehadiran orang Cina yang baru tiba di Melaka juga pada peringkat awal lebih menumpukan kepada kegiatan yang cepat memberi pulangan kepada usaha mereka seperti mengerjakan tanaman ubi kayu dan lombong.

Mereka melibatkan diri dalam kegiatan perlombongan emas dan bijih di kawasan Chindras, Londang, Air Kuning dan Tebong yang terletak di daerah Jasin. Kegiatan melombong emas dan bijih dilakukan oleh orang Melayu sekitar pertengahan abad ke-18 (Braddell 1853). Jumlah lombong bagi kedua-dua jenis perlombongan yang dikendalikan oleh orang Melayu berjumlah 24 buah pada tahun 1818. Perlombongan emas hanya pada skala kecil dengan hasil yang diperoleh antara 40 hingga 60 kati sahaja sebelum ditamatkan kegiatannya pada 1824. Perlombongan bijih lebih bertahan lama sedikit dan pada awal abad ke-19 seramai kira-kira 100 orang Melayu terlibat dalam perlombongan bijih di kawasan itu (Braddell 1853). Pada penghujung 1840-an, kegiatan perlombongan bijih itu bertambah pesat dengan perlombongan juga dikerjakan di kawasan Kesang. Hasil yang dikeluarkan pada waktu itu bernilai sekitar \$18,000. Potensi yang ditunjukkan oleh penghasilan bijih itu membawa kehadiran lebih ramai pelombong Cina yang juga mendapat galakkan dari pihak British.

Kehadiran pelombong Cina ini telah membawa kepada pertambahan penduduk Cina di kawasan Jasin-Kesang menjadikan bilangan mereka sekitar 2,500 hingga 3,000 orang menjelang 1850-an (Braddell 1853). Sejak waktu itu aktiviti perlombongan dalam kalangan orang Melayu semakin diambil alih atau diatasi oleh pelombong Cina (Braddell 1853). Kaedah yang lebih baik yang digunakan oleh pelombong Cina membolehkan mereka mengeluarkan bijih antara 300 hingga 350 pikul sebulan walaupun jumlah lombong yang beroperasi 15 buah sahaja. Pengeluaran sebanyak itu berada pada nilai sebanyak \$480,000 hingga \$560,000 sebulan dengan kadar harga \$1,600 sepikul (Turnbull 1972). Kegiatan perlombongan bijih ini juga mulai merosot berdasarkan dua sebab utama. Pertama kerana jumlah bijih yang terdapat di kawasan itu tidaklah banyak. Kedua kerana kemarahan orang Melayu yang kehilangan aktiviti perlombongan kepada orang Cina. Beberapa kali serangan ke atas bangsal lombong orang Cina dilakukan pada awal 1850-an yang melibatkan korban nyawa (Turnbull 1972). Kedua faktor ini menyebabkan bilangan lombong terus merosot kepada lima buah pada tahun 1854, dan aktiviti perlombongan di Kesang dan Jasin secara rasminya tamat pada tahun 1869 (Turnbull 1972). Namun secara tidak rasmi kegiatan perlombongan terus dilakukan sehingga ke awal abad ke-20, terutamanya di kawasan Chinchin dan Kesang (D.O.J., District of Jasin) 32/1939).

Kemerosotan dalam aktiviti perlombongan menyebabkan sebilangan orang Cina beredar ke kawasan perlombongan di negeri lain atau berpindah ke kawasan lain di Melaka. Sebilangan lagi kekal di kawasan itu dan menyahut perancangan pentadbiran British membangunkan aktiviti pertanian komersil di kawasan itu. Pada awal tahun 1860-an, kawasan seluas 1,000 ekar disediakan untuk tujuan tersebut di samping pembinaan jalan perhubungan yang lebih baik antara kawasan pedalaman itu dengan kawasan pantai. Pada tahun 1870 kawasan pertanian seluas 10,000 ekar lagi dirancang pembangunannya di daerah Jasin. Usaha pembangunan kawasan tanaman komersil yang berlaku di Jasin ini berlaku juga di daerah lain Melaka. Tanaman yang digalakkan diusahakan ialah ubi kayu dan gambir. Tanaman ubi kayu di Melaka mula mendapat perhatian orang Cina sebagai tanaman alternatif yang menguntungkan pada awal tahun 1850-an. Pada tahun 1860, lebih kurang 1,000 ekar tanah di Melaka telah diusahakan tanaman ubi kayu yang menghasilkan 2,000 pikul ubi kayu. Pada tahun 1862 hingga 1869, terdapat lebih kurang 10,000 ekar tanah ditanam dengan ubi kayu. Jumlah keluasan tanah pula terus meningkat sehingga mencapai 19,900 ekar pada tahun 1871 dan menjadi 58,000 ekar pada tahun 1880 dan seterusnya meningkat kepada 93,000 ekar pada tahun 1882 (Jackson 1968). Pertambahan keluasan kawasan yang pesat itu membolehkan Melaka meningkatkan eksport ubi kayu sebanyak lima kali ganda antara tahun 1872 dan 1880.

Pada tahun 1884, harga ubi kayu mula merosot dalam pasaran menyebabkan ramai orang Cina mula meninggalkan perusahaan ini. Dalam tempoh dua belas bulan, dianggarkan 6,000 orang Cina telah meninggalkan Melaka dan berhijrah ke negeri Melayu yang lain. Hampir sepertiga keluasan tanah yang digunakan bagi penanaman ubi kayu ditinggalkan dan cuma tinggal 2,100 ekar tanah sahaja masih diusahakan dengan tanaman ubi kayu. Keadaan semakin merosot menyebabkan kerajaan mula melelong tanah dengan harga yang rendah akibat terbiar atau atas kegagalan pengusaha membayar sewa tanah (Jackson 1968). Walaupun pada tahun 1885, harga ubi kayu meningkat sedikit tetapi peningkatan ini masih gagal menarik perhatian pengusaha untuk meningkatkan semula penglibatan mereka dalam perusahaan ubi kayu. Ketika harga ubi kayu di tahap yang tinggi dari tahun 1885 hingga 1887 antara kawasan penanaman masih giat dengan tanaman ubi kayu ialah Taboh Naning dan Pulau

Sebang. Kedudukan harga pasaran ubi kayu yang tidak menentu maka peladang dan pekebun Cina dan Eropah mengalihkan tumpuan pertanian komersil yang lain. Sebelum abad ke-19 berakhir, beberapa jenis tanaman komersil dicuba kesesuaian tanah dan iklim setempat. Kopi, tebu, lada hitam adalah antara tanaman yang menunjukkan kemungkinan berjaya diusahakan. Kopi misalnya telah cuba diusahakan di Durian Tunggal oleh Tan Hun Guan tetapi tidak berjaya diteruskan (Allen & Audrey G. Donnithorne 1957). Tebu juga menjadi tanaman komersil yang besar, sebaliknya diusahakan secara kecil-kecilan di daerah Alor Gajah dalam kalangan orang Cina dan Melayu di situ.

Kemunculan tanaman komersil menjejaskan ekonomi orang Melayu

Tanaman komersil yang digalakkan perusahaannya oleh pentadbiran British di Melaka dengan memberi sewaan tanah yang murah, kemudahan mendapatkan modal dan penyediaan infrastruktur yang lebih baik ialah tanaman gambir. Tanaman ini yang sudah pernah diusahakan sejak zaman penguasaan Belanda lagi dan mengalami kemerosotannya pada awal 1840-an cuba diperkembangkan semula. Pada pertengahan kedua abad ke-19, tanaman ini dijalankan secara besar-besaran oleh pengusaha Cina sekitar tahun 1870 hingga 1880. Antara tahun 1871 hingga 1879, eksport gambir di Melaka hampir tiga kali ganda daripada eksport lada hitam. Harga gambir meningkat ekoran daripada permintaan yang tinggi dalam bidang pencelupan dan penyamakan binatang. Tambahan pula, pengusaha Eropah di Singapura juga memerlukan gambir untuk dieksport ke Eropah (Jackson, 1968). Kawasan utama tanaman gambir ialah mukim Ayer Molek, Serkam dan Kuala Sungai Baru. Pada tahun 1880, Melaka mempunyai 148 ladang gambir dan meningkat kepada 171 ladang gambir pada tahun 1882 (James C. Jackson 1968). Sehingga tahun 1890, terdapat seluas 7,325 ekar tanah telah ditanam dengan gambir yang meliputi 264 kawasan di beberapa mukim di Melaka (Straits Settlements Blue Book 1889). Kawasan Jasin menjadi fokus pembangunan pertanian komersil sehingga muncul sebagai pengeluar gambir yang terbesar di Melaka sehinggalah ke tahun 1893 (Straits Settlements Blue Book 1889). Perusahaan menanam gambir ini menjadi berkurangan pada akhirnya akibat daripada tanaman ini amat mudah diserang oleh penyakit serta belalang. Selain dari itu tanaman ini juga menghadapi persaingan yang hebat dari satu lagi jenis tanaman yang dapat menghasilkan keuntungan yang lebih besar lagi pada masa itu, iaitu tanaman pokok getah.

Getah diperkenalkan tanamannya di Melaka oleh generasi ketiga Cina Baba, Tan Chay Yan, pada tahun 1895 yang ketika itu masih dalam usia pertengahan 20-an. Beliau membawa balik dari Singapura sembilan anak pokok getah dan menanamnya di ladang yang berkeluasan 17 hektar di Bukit Lintang. Ladang itu adalah ladang ubi kayu bapanya. Pada tahun 1904 beliau berjaya mengeksport 450 kg getah keping yang merupakan penghasilan pertama getah dari Melaka. Semasa menanti pokok getahnya boleh ditoreh, beliau sentiasa menggalakkan orang lain mengikut jejaknya menanam getah. Hubungan kekeluargaan yang baik dalam kalangan Cina Baba dan kedudukan Tan Chay Yan sebagai anggota majlis bandaran Melaka, galakannya mula mendapat sambutan dan sokongan terutamanya apabila ternyata tanaman getahnya berjaya. Pada tahun 1898, tanaman getah secara ladang telah pun dimulakan di kawasan timur laut Melaka iaitu di kawasan Asahan, Jasin Utara (Annual Reports on the Colonies Straits Settlements 1890-1929). Keluasan kawasan yang ditanam dengan pokok di Asahan ini walaupun tidak besar tetapi ia menandakan wujudnya kepercayaan kepada potensi komersil tanaman ini. Ketika ini di negeri lain di Tanah Melayu jumlah keseluruhan tanaman ini pun baru berjumlah 345 ekar sahaja (Annual Reports on the Colonies Straits Settlements 1890-1929).

Sejak dekad pertama abad ke-20, perkembangan tanaman getah di Melaka digerakkan oleh keluarga kenamaan dan hartawan Cina Baba setempat yang juga mempunyai hubungan rapat dengan usahawan Cina dan syarikat permodalan Eropah di Singapura. Keluarga Tan Cheng Lock, Lee Chen Yan dan Lee Chim Tuan misalnya antara peneraju awal keterlibatan utama orang Cina Melaka mengusahakan getah. Usaha golongan ini telah membentuk ladang getah seperti *Nyalas Rubber Estates Limited*, *Malacca Pinda[h] Rubber Estate*, *Ayer Molek Rubber Company*, *United Malacca Rubber Estate*, *Bukit Jelutong Estate*, *Bukit Katil Rubber Estate*, *Punggor Rubber Estates*, *Cathay Rubbeer Estate*, *Kew Rubber Estate* dan *Tong Watt Rubber Estate*, *Diamond Jubilee Estate*, *Malacca Rubber Plantation*, *Bemban Rubber Estate*, *Leong Tong Jee Estate*, *Ong Meng Hoeh Estate* dan banyak lagi (Fail Pejabat Daerah Jasin No. DOJ 68/1914). Malah hubungan Tan Cheng Lock misalnya dengan syarikat *Sime Darby* membawa keterlibatan syarikat itu ke dalam perladangan getah di Melaka (Lee Kam Heng 2003). Perkembangan

ladang getah yang banyak dan luas itu mengukuhkan kewujudan ekonomi dualisme, iaitu antara ekonomi pengeluaran komersil yang dimonopoli oleh orang bukan Melayu, terutamanya orang Cina dan Eropah dengan ekonomi pengeluaran yang lebih bersifat sara diri dan tradisional yang majoritinya diusahakan oleh orang Melayu.

Perkembangan tanaman ini dibantu oleh kehadiran buruh India dan sebilangan kecil juga orang Melayu. Orang Melayu walaupun pernah melibatkan diri dalam tanaman wang seperti gambir dan lada hitam pada abad ke-18, tetapi tidak berkembang. Hasilnya adalah untuk kegunaan sendiri atau ditukarkan dengan barangan lain dengan penduduk setempat. Lebih daripada itu sahaja akan dijual kepada peraih atau pengumpul komoditi itu di bandar. Situasi yang sama berlaku pada tanaman lain seperti tebu, ubi kayu, sirih, kelapa dan buah-buahan yang ditanam pelbagai jenis pokok itu pada satu kawasan atau kebun yang diusahakan atau di sekitar kawasan rumah. Keterlibatan mereka dalam aktiviti ekonomi wang ialah sebagai pembuka hutan untuk dibuat ladang tanaman komersil kaum bukan Melayu dan menjual kayu api. Tanaman kelapa juga selalunya adalah untuk kegunaan sendiri. Bagi mereka yang mempunyai tanah yang agak luas yang kurang sesuai untuk tanaman padi atau tanaman lain, maka tanaman pokok kelapa menjadi pilihan. Kawasan yang berpayau dan sering berlaku kegenangan air seperti kedapatan dengan luar di Kesang, di lembangan sungai dan pantai Klebang umpamanya tanaman kelapa diusahakan. Di kawasan Kesang kelapa diusahakan oleh tuan tanah dengan menggunakan perantau Jawa dan Bugis yang baru mendiami kawasan itu. Namun oleh kerana sifat tanah di mana tanaman itu diusahakan tidak begitu sesuai maka hasil yang diperoleh tidaklah dapat menjadi bahan komersil yang besar.

KESIMPULAN

Melaka menjadi titik permulaan kepada perubahan sosioekonomi kesan daripada episod penjajahan kolonial Barat. Melaka dahulunya terkenal sebagai pelabuhan perdagangan rempah yang maju telah menarik minat kuasa Portugis, Belanda dan seterusnya British untuk menakluki dan menguasai ekonomi di Melaka. Kesannya, pemerintahan kolonial telah mengubah sosioekonomi masyarakat Melayu di Melaka. Dasar pecah dan perintah yang dilaksanakan oleh British telah menyebabkan wujudnya pengenalan kaum mengikut sektor ekonomi. Masyarakat Melayu dikekalkan sebagai petani miskin yang terlibat dalam penanaman padi untuk menjamin sumber makanan tidak terputus bagi kelangsungan hidup untuk semua kaum di Melaka termasuk pemodal Eropah. Layanan berat sebelah terhadap masyarakat Melayu oleh British telah mencambah perasaan nasionalisme untuk bangkit mendapatkan semula hak ekonomi sebagai penduduk asal di Melaka sekali gus mengubah corak ekonomi *dualisme* yang ditinggalkan oleh British. Amat jelas sekali pemerintahan kolonial ternyata memberi impak yang besar terhadap kegiatan ekonomi masyarakat Melayu di Melaka hingga era kemerdekaan

RUJUKAN

- Abdul Latip Talib. 2009. *Dol Said Pablawan Naning*. Selangor: PTS Litera Utama.
- Allen, C.G. & Audrey G. Donnithorne. 1957. *Western Enterprise in Indonesia and Malaya*. London: Routledge Taylor & Francis Group.
- Ang Kean Hua. 2015. Melaka sebagai pusat pelancongan dunia: Dapatkah dipertahankan? *GEOGRAFLA Online™ Malaysian Journal of Society and Space* 11(9):75-85.
- Annual Reports on the Colonies Straits Settlements 1890-1929*.
- Braddell. 1853. 'Note of a trip to the interior from Malacca'. *Journal of Indian Archipelago and East Asia*, Vol. VII, Singapore.
- Buyong Adil. 2020. *Sejarah Melaka*. Kuala Lumpur: Dewan Bahasa dan Pustaka.
- Colin Barlow. 1978. *The Natural Rubber Industry*. Kuala Lumpur: Oxford University Press.
- Data Asas Negeri Melaka. 2011. Melaka: Unit Perancang Ekonomi Negeri Melaka.
- Hervey, D.F.A. 1884. Valentyn's Description of Malacca. *Journal of the Straits Branch of the Royal Asiatic Society* 13 (June): 49-74.
- Diane Kraal dan Jeyapalan Kasipillai. 2014. The Dutch East India Company's tax farming in 18th century Malacca. *eJournal of Tax Research* 12(1).

- D.O.J. (District of Jasin) 32/1939, *Annual Report on the Social and Economic Progress of the People of Straits Settlement.*
- D.O.J 140/87 (*Report of the Mukim Sungai Rambai*, 29.7.1887).
- Dodwell and Miles, eds. 1839. *Bengal Civil Servants: Appointments 1780-1838. Alphabetical List of the Honourable East India Company's Bengal Civil Servants, from the year 1780 to the year 1838.* London: Longman, Orme, Brown and Co.
- Dartford, G.P. 1961. *A Short History of Malaya.* Longmans: Hong Kong Printing Edition.
- Drabble, J.H. 1973. *Rubber in Malaya 1876-1922, The Genesis of the Industry.* Singapore: Oxford University Press.
- Fail Pejabat Daerah Jasin No. DOJ 68/1914.
- Hall, D.G.E. 1981. *Sejarah Asia Tenggara.* Kuala Lumpur: Dewan Bahasa & Pustaka.
- Hooker, M.B. 1972. *Adat Laws in Modern Malaya: Land tenure, Traditional Government and Religion.* Kuala Lumpur: Oxford University Press.
- Izzuddin Al Jitrawiy. 2019. *Malacca Has Fallen.* Selangor: Karya Publika Sdn. Bhd.
- James C. Jackson. 1968. *Planters and Speculators Chinese and European Agricultural Enterprise in Malaya 1786-1921.* Singapore: University of Malaya.
- Kraal, D.L. 2013. Of taxes: An enquiry into Dutch to British Malacca, 1824 - 39, in John Tiley. ed. *Studies in the History of Tax Law*, Volume 6, Hart Publishing, Oxford, United Kingdom.
- Kevin Young. et al., 2000. *Malaysia Pertumbuhan dan Keadilan dalam Masyarakat Majmuk.* Kuala Lumpur: Jabatan Penerbitan Universiti Malaya.
- Khoo Kay Kim. 1972. *Semenanjung Tanah Melayu Suatu Kajian Kemasyarakatan dan Ekonomi 1900-1940.* Kuala Lumpur: Dewan Bahasa & Pustaka.
- Kratoska, Paul H. 1983. Land Law and Land Tenure in British Melaka. Dlm. Sandhu, Kernia Singh, & Wheatley, Paul (pnyt.). *Melaka: The Transformation of a Malay Capital, c. 1400-1980*, vo. 1. Kuala Lumpur: Oxford University Press.
- Lee Kam Heng. 2003. Establishing an enduring business: The great Eastern OCBC group, dlm. Heidi Dahles, van den and Otto van den Muijzenberg. (pnyt.). *Capital and Knowledge in Asia, Changing Power Relations*, hlm. 146-170. London: Routledge Curzon.
- Lugiman Abu Seman. 2004. Punca-Punca Tunggakannya Cukai Tanah Bagi Syarat Jenis Bangunan di Daerah Melaka Tengah, Tesis Doktor Falsafah. Johor: Universiti Teknologi Malaysia.
- Leon Comber. 2007. *Peristiwa 13 Mei Sejarah Perhubungan Melayu-Cina*, Selangor: IBS Buku Sdn. Bhd.
- Mohd Hafilah Piei. 1987. *Malaysia Isu-isu Pembangunan.* Bangi: UKM.
- Nordin Hussin. 2007. *Trade and Society in the Straits of Melaka: Dutch Melaka and English Penang, 1780-1830.* Denmark: Nordic Institute of Asian Studies (NIAS).
- Newbold, T.J. 1971. *Political and Statistical Account of the British Settlements in the Straits of Malacca*, with an introduction by C.M. Turnbull, reprint of the 1839 edition. Singapore: Oxford University Press, Singapore.
- Sity Daud & Zarina Othman. 2005. *Politik dan Keselamatan.* Bangi: Universiti Kebangsaan Malaysia.
- Song Ong Siang. 1923. *One Hundred Years' History of the Chinese in Singapore*, London: J. Murray.
- Small, D.S. 1940. *Annual Report on the Social and Economic Progress of the People of the Straits Settlements, 1938*, London: Straits Settlements Blue Book, 1889 Government Printing Office, Singapura, 1890.
- Shamsul Amri. 1990. *Masyarakat Malaysia yang Membangun.* Kuala Lumpur: Dewan Bahasa dan Pustaka.
- The Law of the Straits Settlements, 1835-1900.* London: Waterloo and Sow Ltd., London, 1920, hlm. 46; dan *Annual Administration Report Malacca 1887.* Singapore: Government Printing Office, 1888.
- Turnbull, C.M. 1972. *The Straits Settlements 1826-1867.* Kuala Lumpur: Oxford University Press.

Nurdiyawati Abidin
 Jabatan Sejarah
 Fakulti Sains Kemanusiaan
 Universiti Pendidikan Sultan Idris
 39500 Tanjung Malim
 Perak

Adnan Jusoh, Ph.D
Jabatan Sejarah
Fakulti Sains Kemanusiaan
Universiti Pendidikan Sultan Idris
39500 Tanjung Malim
Perak
E-mel: adnan.jusoh@fsk.upsi.edu.my

Diserahkan: 22 Ogos 2021
Diterima: 15 November 2021
Diterbitkan: 15 Disember 2021